



Casa Mesaglina a Trin

L'anteriura ustaria a Trin è daventada center da guaud da mun-togna ed albiert da giuventetgna.

4



Conflict tranter Spagna e Catalogna

Il president Carles Puigdemont e ses quatter ministers èn fugids en a Bruxelles en Belgia.

11

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Fra Clau, igl alternativ

■ (anr/abc) Ins munglass manegiar ch'ins hagi retschiert el decuors digl onn massa informaziuns entuorn il patrun dalla Svizra. Treis personalitads ein sefatschentadas cun el venderdis sera en lur posiziun ella baselgia parochiala a Breil. Igl ei stau in'ura e mesa meditativa. Per Stefan Engler, advocat e politicher, anteriur cusseglier guvernativ ed actual cusseglier dils stans dil Grischun, ei la confruntaziun cun el stau ina sfida. *Marius Risi*, igl anteriur menader

digl Institut grischun per la perscrutaziun dalla cultura, ha dau in maletg historic digl eremit e da siu temps. La professoressa per dogmatica alla Scol'aula da teologia a Cuera, *Eva-Maria Faber*, ha perencunter sespruau d'intermediar la part mistica da Fra Clau. Buc aschi sempel per laics. Venderdis proxim cuntinuescha il program «Ina sentupada cun Fra Clau, sia diversitad e profundadad» a Breil.

> PAGINA 5

Era gieus litterars attiran

27avels Dis da litteratura a Domat

DA FLURIN ANDRY / ANR

■ Il tema, il fil cotschen dals Dis da litteratura a Domat, eran quest onn ils gieus, gieus per uffants, per tut la famiglia, però era gieus cun plets e cun paratgs. «Noss tema gieus avain nus tscherni perquai che nus vulvan empruvar novs 'settings' da prelecziuns als Dis da litteratura a Domat», ha ditg *Natalia Tuor* dumengia. Ensemen cun *Laura Decurtins*, *Sara Hermann*, *Sereina Nay* e *Corina Schmed* ha ella organisà ils 27avels dis litterars a Domat. (L'actura *Sara Hermann* nun ha pudì prender part da l'arranschament causa ch'ella era cun Mummenschanz sin turnea.) Exempels da quels experiments ch'il comité d'organisaziun aveva preparà per il numerus public èn la Shot-Story Night da venderdi saira e la Living Library da sonda suentermezdi. «A l'entschatta era il public forsà in zic irrità da questas furmas da confruntaziun cun la litteratura, ma quai è spert sa midà», ha constatà *Natalia Tuor*, «tuts han fatg part cun corp ed olma.» In highlight dals Dis da litteratura da quest onn è stà tenor ella il program «Remas» da *Mario Pacchioli*, il musicist ed actur ha



Il comité d'organisaziun dals Dis da litteratura cun (da san.) *Corina Schmed*, *Sereina Nay*, *Natalia Tuor* e *Laura Decurtins*. Sin la fotografia manca *Sara Hermann*.


FOTO F. ANDRY

cumponì melodias per numerusas poesias rumantschas. La sala era occupada plainamain. «Per tut las preschentaziuns da cudeschs novs avain nus gì diversa glieud interessada», ha ella cunti-

nuà. Il comité d'organisaziun sa cumplettescha, sco che *Natalia Tuor* ha ditg, bain, «perquai vegnin nus ad esser cun gronda probabladad era proxim onn tuttas da la partida.» Cun l'organisaziun

dals 28avels Dis da litteratura han ellas già cumenzà, «faschond in'emprima analisa per vesair tge che s'ha verifitgà.»

> PAGINAS 2/3



Pader Felicissimo Thalparpan è ia an pensiun.

FOTO G. N. STGIER

Bung viadi!

■ (anr/gns) Cun en sarvetsch divin ecumen è l'antiera populaziun da Lantsch piglia cumgea da pader Felicissimo Thalparpan. Siva 40 onns pastora-zion an Val Alvra vo el cun prest 90 onns ainten la miritada pensiun. La seira dalla veta passainta el alla clostra dalla Madonna del

Sasso aint igl Tessin. Igl è sto en adia fitg emozional cun bliers plets da bagnvuglientscha pigl pader partent. Sonda parta el da Surmeir vers igl Tessin. Adia ot stimo pader, bung viadi ed ad en reveir.

> PAGINA 8

Concurrents han catschau anavon

■ (anr/abc) Il november 1972, pia avon exact 45 onns, levì el atgnamein lantschar zatgei pign ed en lavur accessorica, gi Beat Livers oz. Igl um da fatschenta dat ina retrospectiva sils onns dalla conjunctura aulta. Quels gis ha *René Chatelain*, redactor ed editur da «Graubünden exclusiv», publicau ina revista speciala che dat investa els temps dils piuniers dall'infrastructura turistica.

Il giubileum da 45 onns Sport Beat ei motiv da dar in sguard

anavos. La fatschenta a Breil haveva *Beat Livers* fundau igl onn 1972 senza saver tgei ch'igl avegnir porti. Sia finamira fuvì stau da porscher in bien servis als indigens e hosps da vacanzas che vegnevan a Breil per ir cun skis. La crappa da scarpsch ha buca pudì demotivar e spuentar *Beat Livers*. Senza quella havess el forsà gnanc ughegiu dad ir a Flem lezza gada, raquenta el ella retrospectiva.

> PAGINA 4

Ils custs s'augmentan permanentamain

■ (anr/gns) En il center da la dieta da la Cuminanza d'interess da las vischnancas pitschnas è stà il provediment da la sanadad e la finanziaziun da quel en noss chantun. Represchentà la regenza ha cusseglier guvernativ *Christian Rathgeb*. El ha cunzunt punctuà che da la vart da l'Uffizi federal da sanadad daventian las regulaziuns e prescrip-

ziuns adina pli autas. *Rudolf Leutbold*, il manader da l'Uffizi da sanadad dal Grischun, ha ditg ch'ìls fatgs da sanadad, quels sa midian permanentamain. *Arnold Bachmann*, il directur dal spital chantunal, ha menziunà ch'ìls custs da la sanadad publica s'augmentian mintg'onn per 4%.

> PAGINA 6



La rizza as zoppa gugent in mantuns da föglias. FOTO CHASA DA BES-CHAS ARCHE CUOIRA

Che far cun rizzas deblas e feridas

■ (anr/afi) Las ultimas observaziuns da rizzas in Engiadina Bassa sun gnüdas fattas sül territori da la fracziun da Ramosch i'l cumün da Valsot. Là as vaiva chattà tanter oter eir üna rizza indeblida. Per salvar la bescha es ella gnüda manada pro'l veterinari. Pel Grischun es la Staziun da rizzas illa Chasa da bes-chas Arche a Cuoira responsabla per l'allevamaint da rizzas in-

deblidas e feridas. Davo cha las bes-chas amaladas han ragiunt ün pais da bundant 600 grams e chi s'han remissas vegnan ellas darcheu missas in libertà e quai i'l lö dal chat. Qua cha la rizza es üna bescha chi fa il sön d'inviern segua quist pass per regla pür vers las stagiuns cun temperaturas plü chodas.

> PAGINA 7



Cusseglier guvernativ *Christian Rathgeb* cun *Regula Götte*, la presidenta da la Cuminanza d'interess da las vischnancas pitschnas. FOTO G. N. STGIER

10045
9771424749004

Servetsch d'abunents e da distribuziun: tel. 0844 226 226
mail: abo@somedia.ch